

太上洞玄靈寶十號功德因緣妙經

太上大道君與五老上帝 無極飛天大聖 無上高真 十極真人 左
玄真人 右玄真人 妙行真人 普濟真人 施命真人 濟厄真人
救苦真人 大慈大悲真人 大慈大慧真人 正一帝君 諸大天師
金剛神王 力士 天龍 鬼神等 於棄賢世界 以神通力忽變無數
紅玉床座 光明晶皎 諸真聖眾 而列其上

爾時

道君乃登七寶獅子之座 其座以雜寶瑠璃 真珠 火珠 明月珠
碼腦 珊瑚 琥珀 紅玉 白玉 碧玉 綠玉 黃玉 玻瓈 黃金
紫金 青火金 香檀木 嚴飾其上 於此座上 自然生百寶蓮花
百千層葉 一一蓮葉之上 現出十方淨土 悉皆具足 會中有大
七寶騫林 細葉交密 香氣郁結 廣高莫測 風動和雅 有微妙音
其間自然飛化 種種天樂 不鼓自鳴 是時 道君即於蓮臺之上
正箕而坐 放身中五色光明 昭耀無邊天界 空中聖眾步虛旋遶
歌詠讚嘆 即時天雨香花 大妙真花 小妙真花 紅金焰花 紫
金焰花 鳳頭火花 郁馥火花 妙服珍果 白鶴 鳳凰 喜祥鸚鵡

太上洞玄靈寶十號功德因緣妙經

清微藏書閣

青鸞孔雀 大善金鳥 光明金鳥 念道金鳥 人言金鳥 樂音金
鳥 悉銜異花 飛翔會上 即有十方神仙 飛仙 天仙 地仙 水
仙 火仙 五嶽諸仙 及諸大小洞天一切大仙 各持符執節 旛蓋
寶幢 歌詠讚嘆 吟和靈章 奏大妙樂 供養道君 即時大地振動
會中相視 奇異莫測 有一真人 名曰普濟 於眾中出 整理衣
巾 安詳雅步 到道君前 稽首頓顙 上白道君曰 賤臣愚昧 不
測道君修何道果 證是神通自在 與元始天尊無異 伏願哀念賤臣
及未來世眾生 及愍後學道士 演說斯理 令悟甚深法要 登無
上道 獲難思果 賤臣幸也 道君聞普濟語 歎言 善哉善哉 汝
有宿本大智 能為未來濁劫眾生抑揚妙法 汝可存念 為汝說此因
果 我於無數劫來 念本師元始天尊十號功德 讚嘆吟詠 鑄寫圖
飾 想念元始天尊 禮拜供養恭敬 千萬珠金捨施 無慳惜心 至
於今日 無一念怠慢 而成此功德
普濟復白道君 未審元始大聖天尊十號 賤臣及與會眾 得而聞不
臣願與諸真仙眾 讚歎歌詠 言訖 叩頭稽顙悲涕 仰視道君
一座大眾 皆自默念 仰望真容 而希宣說

道君開顏微笑 告普濟曰 汝可精思一聞 得證無上道果 道君復告普濟曰 我本師大聖元始天尊 虛無自然 妙道化身 從不可名言塵沙劫來 濟度一切眾生 入無上道 具七十二相 八十一好 十號圓滿 或現千光相 或現無邊相 或現大身相 或現小身相 或變身入黍米之中 或開毛孔 納無邊世界 或掌三千大千世界 或雨甘露 灑熱惱眾生 或作帝王 制伏暴亂 或為賢佐 匡乎有道 或有聖君 爰降為師 有如是功德 神通妙相 莫能窮嘆 而有十號 讚揚總名 是故十號者 無上道 元始 太極 高皇 光明 玉帝 正法王 大慈父 仙真師 天尊 普濟復告道君言 賤臣雖聞十號功德 未審有何解說 令我及諸大眾 乃至未來濁劫眾生 令得了悟至真法要 伏願愍念賤臣告請 一一宣揚十號微妙功德行相之法 賤臣幸也 道君復告普濟曰 所言十號者 是諸真聖眾天人 與天真皇人 開赤明和陽天中白玉殿內百寶之匣 風錦之笈 譯大梵隱言 而為正音 所言無上道者 乃是元始天尊道果成時 於諸眾法無祖無宗無根無係 而一相俄立 乃萬法依憑 為萬法王 為萬相之祖 為一

太上洞玄靈寶十號功德因緣妙經

清微藏書閣

氣始 虛無不測 溟滓何知 居於萬眾之先 故名無上道 所言元始者 居至道源 作窈冥本 故曰元始 太極者 從無數劫來 判朴之際 報身乃現 於是始青天中而現化身 故名太極 高皇之號者 尊居無頂天中 逍遙大羅之上 名無上之上 超有象之先 是故號曰高皇 所云光明者 是謂法性真體瑩若瑠璃 易功德光 照昏闇處 銷眾生障 破煩惱山 故號光明也 玉帝者 位居玉闕之中 尊極萬天之帝 凝然真性 妙相具足 巍巍蕩蕩 出眾真之中 同星拱月 故稱玉帝 所言正法王者 演說正法 破邪異宗 開無為道 滅一切苦 明無邊法門 印可三天經籙 降伏魔邪 除諸小見 令入大乘之道 如大醫王 法藥治苦 若春雷震 發動萌芽 滋長含生 如灑甘露 沃潤眾根性 故號正法王 大慈父者 從無量無邊劫 不可測微塵沙劫 出現大聖身 濟度群生 脫生死羅 入正真道 或於惡趣拯救罪苦眾生 過於赤子 是名大慈父 所言仙真師者 道君告普濟言 我與汝及無邊無量劫來 天尊大聖 諸真大仙 昇無上道果 一切天尊 諸真聖眾 天王天帝 玉帝大帝 三華帝 五帝大魔 名山洞府 虛空水陸 一切含生

已得果 今得果 及未得果者 皆是我本師元始天尊 現虛元法身 自然報身 元始化身 以真諦法種種引導 說三十六部尊經 或於林泉名山大嶽 或於大洞天 小洞天 或在三十六天之中 或在三十二帝宮內 或在三清大羅及無邊界 或諸異域 及一切含生類聚之處 有形有相 如是種種 隨根察其言語 變現化引 未開度者 誓與開度 未得道者 誓令得道 未安樂者 誓使安樂 未解脫者 誓化解脫 未昇玄者 誓引昇玄 以此弘誓 開導一切 演說三洞要術 大藏妙文 天書玉字 金寶祕篇 皆悉具足 傳授諸法 雖復無邊 我總括流通 十二事部類 分別隨根不同 令一切眾生各歸一趣 得悟正法

一者本文 二者神符 三者寶訣 四者靈圖
五者譜籙 六者戒律 七者威儀 八者方法
九者術數 十者記傳 十一者讚誦 十二者章表

具足如是智慧 開如是法門 導化接引濁劫眾生 視如諸子 諸子而自不曉悟 雖布大慈如是 設悲念之網 眾生戀於聲色 種種纏愛 而遊還三界 不歸正道 唯執邪見 而遇天尊化誘至真之

太上洞玄靈寶十號功德因緣妙經

清微藏書閣

法 皆以開悟 而從劫已來救苦無倦 故號仙真師
普濟白言道君 未審十二部事 妙理法要 有何相化 如大法雨
隨器充滿 變動眾生根性 賤臣未曉微妙之理 乞為解說一一悟解
賤臣幸也

道君告普濟曰

第一本文者 天書八會鳳篆龍章 是為天地萬物之本 開化人神
成立諸法 主召九天神仙上帝 較定圖籙 調政璇璣 攝制艷都
降魔伏鬼 敕命水帝 召龍止雲 天地劫期 聖真名諱 所治臺城
眾聖境界 廣宣分別 種種皆差 服御元精化形之法 皆演玄妙
明了具足

第二神符者 雲篆之文 神真之信 召攝眾魔 威制神鬼 總氣御
運 保命留年

第三寶訣者 天真上聖述釋天書八會之字 以為正音 開視大道

第四靈圖者 眾聖化跡 應現無方 圖寫變通 令物悟解

第五譜籙者 眾聖記述仙真名諱 宗本胄胤 神官位緒

第六戒律者 條制敕禦 防非檢過 詮量罪福 分別輕重

第七威儀者 具視齋戒進退楷模 俯仰節度 軌式容止
第八方法者 眾聖著述丹藥祕要 神草靈芝 柔金水玉 修養之道
第九術數者 明辨思神 存真念道 心齋虛忘 遊空飛步 餐吸六
氣 導引三光 鍊質化形 仙度之法
第十傳記者 是眾聖載述學業 得道成真 通玄入妙 修因方所
證果時節
第十一讚頌者 眾真大聖巧飾法言 稱揚正道 令物信樂 發起回
向 生尊重心
第十二章表者 師資授受 妙寶奇文 三元八節 登壇告盟 啟誓
傳度 悔謝請福 關告之辭 此十二事部 總彰正道 一切意趣
無不周備 化引三乘 證無上道 我大聖本師 號天尊者 常處三
清之上 超眾聖道界 顯世地卑 獨居天為最尊 故號天尊 此是
元始天尊十號功德 法門妙趣
道君復告普濟曰 若有未來濁劫眾生 得聞我本師大聖元始天尊十
號因緣功德 更能圖鑄形像 歌詠讚嘆 禮拜恭敬 演說是法 此
人九祖生天 宿業消滅 身得長生不死之道 家門安泰 子孫昌熾

太上洞玄靈寶十號功德因緣妙經

清微藏書閣

世世遇道 不遭厄橫 若有人書修此經 功德無量 說是十號功
德已 於是在會大眾 皆得昇進仙階 超拔聖位 悉悟無上正真道
果 普濟真人證天中尊號 曰尋聲救苦天尊 具八十一好 七十二
相 十號滿足 光明瑩徹 空中讚言普濟 有如是告請功德 不可
思議 難測智慧 當於來世 與一切眾生為道師中王 為大法眼
與道君神通何異 於是一切來者眾生 聞是法要 離生死苦 悟正
真道 於是普濟承道君神力 欲昇三天 而作頌曰
道君大慈悲 金口演真藏 十號今得聞 令我證真道
稽首無為師 千光具足相

太上洞玄靈寶十號功德因緣妙經竟

天運辛卯年酉月正一天師清微弟子洪鼎堅羅大英恭錄彙編

鞠昕延複校